

Ustareias a Radons on pitia

Federico Belotti/RTR

Perveia dalla mancanza da neiv n'èn igls runals digl territori da skis per gronda part betg stos an funcziun, chegl cun consequenzas gravantas per las ustareias a Radons. RTR ò duman-do Oliver Bühler e Fadri Arpagaus dallas ustareias pertutgeidas.

Igl è sto en nosch anvien per las ustareias a Radons aint igl territori da skis da Savognin. Perveia dalla mancanza da neiv n'èn igls runals per gronda part betg stos an funcziun – cun consequenzas gravantas per las ustareias Steil'Alva ed igl Berghuus Radons. Sainza access allas ustareias cun en runal n'ègl betg pussebel da far fatschentas scu planiso.

Sperar sen neiv

Scu chegl tg'igl ustier dalla Steil'Alva, Oliver Bühler, ò detg anvers RTR, vegia el gia radond 200'000 francs pi paca sviouta tranter Nadal e Bumang. Durant bungs deis benevainta igl ustier numnadamaintg radond 1000 persungas ainten l'ustareia. Sch'igls runals na cureschan betg, ègl dantant angal pacs tgi catan la veia a Radons. Per l'ustareia lavouran 15 persungas, chellas èn stadas a tgesa sur igls deis da festa. «Cunche gl tgi la sviouta è chest'onni pi pitschna, na vignan igls collaboratours betg da gudagner tant scu an otras staschungs», valetescha Olivier Bühler la si-

«Schi dat en bung favrer, alloura speragn nous da pudeir mitschier cun en îgl blo»

Oliver Bühler

tuaziun actuala. Tar igl cantun vegia el dumando per ageid an furma da lavour curta. Ossa spera el tgi detta neiv nova e chinta tgi chel anvien possa anc neir spindro. «Schi dat en bung favrer, alloura speragn nous da pudeir mitschier cun en îgl blo», ò el managea.

Er igl Berghuus pitescha

Mal èn igls affars er marschos aint igl Berghuus a Radons. Scu chegl tg'igl ustier Fadri Arpagaus ò detg, seian els tranter 70–80% davos igls affars digl anvien passo. «Nous eran pronts per chel znvren cun avonda personal per dar andretg gas», ò detg igl ustier. Ossa lavouran digls 40 ampluias ed amplueidas igl mument angal 20. Er el vegia dumando per ageid finanziel tar igl cantun an furma da lavour curta. «Igl frust tar me è er chel en zichel, ma da l'oter mang ègl er bel da vaseir tg'igls giasts vignan tuttegn aint igl Berghuus – e chegl mutivescha an mintga cass», ò Fadri Arpagaus sincero.

Runals von puspe

A parteir digls 18 da schaner duessan igls runals aint igl territori da skis da Radons-Cartas puspe esser averts. Uscheia tgi ena pista collescha puspe las ustareias a Radons, ò detg Curdin Baltermia, igl directour tecnic dallas Pendicularas da Savognin. Schi las temperaturas restan freidas, alloura possa chella pista neir mantigneida. Vessigl da neir pi tgod e betg da neiver, pudessigl dantant puspe neir stretg cun la pista anfignen Radons.



Sainza access – nigns giasts. L'ustareia Steil'alva è dependenta da neiv e digls runals tgi von.



Fadri Arpagaus e sia squadra digl Berghuus Radons eran pronts pigl anvien. Ma alloura ègl nia tot oter tgi spitgia.

Fotos RTR